

## GRISCHUN

## Promover energia solara

La regenza grischuna vul promover l'energia solara. Quai cun la segunda etapa dal «Green Deal». Uschia ha la regenza respundì sin ina incumbenza dal deputà social-democratic Lukas Horrer. Il deputà pretenda che la regenza elavuria ina strategia per ina offensiva solara en il Grischun cun mesiras concretas ed in plan da temp e finanzas. Via il «Green Deal» vul la regenza examinar tge daners ch'il chantun pudess impunder per promover l'energia solara, però era co simplifitgar la lubientscha per implants solars. Il Cussegl grond decida en ina da las proximas sessions sch'el vul surdar l'incumbenza da Lukas Horrer a la regenza u betg. Per l'emprima etapa dal «Green Deal» ha il Cussegl grond concedì l'onn passà 68 milliuns francs – fin 2050 vai per fin per 1,8 milliardas francs. Finamira è da cuntanscher sin il 2050 netto nulla emissions da CO<sub>2</sub>. En il Grischun vegn actualmain produci 1% dal current cun energia solara. (rtr/fmr)

## TAVAU

## Nov parc da skate

A Tavau vegn realisà in skatepark sin la piazza da parcar da la pendiculara da Parsenn. La regenza, la gruppa d'interess ed ulteriurs partenaris han definitivamain fatg liber la via per il project, quai communitgescha la vischnanca da Tavau. Fin l'entschatta d'avust vegn il parc construì ed ils 17 d'avust vegn el avert uffizialmain. Fin uss hai dà a Tavau duas pussaivladads da far il skaten, dentant n'èn quellas betg adattadas per entschaviders ed entschavidras. Diversas unions han alura fundà la gruppa d'interess «Sk8 Tavau» per engrondir la purschida. Tranter auter han era ils giuvenils da Tavau gidà e construì plirs elements dal parc. Il nov skatepark stat a disposiziun durant ils mais da stad e vegn manà da la vischnanca da Tavau. L'enviern vegn il parcadi duvrà da las pendicularas. (rtr/fmr)

## LANDQUART



Vista or dal stan da tir sin las schibas.

FOTO MAD

## Credit supplementar per l'implant da tir

Ils da Landquart han dà glisch verda per il credit supplementar da 45 000 francs per sanar l'implant da tir «Eichrank» ad Igis, communitgescha la vischnanca Landquart.

La radunanza communal ha plinavant approvà unanimamain il quint 2021. Quel serra cun in surpli da bundant 4,7 milliuns francs. Quai tar expensas da bundant 39 milliuns francs ed entradas da bunamain 44 milliuns francs. Las investiziuns netas muntan a var 10,2 milliuns francs. La gronda part da quests daners vegn duvrada per construir la nova halla da sport Ried e per sanar la via da la staziun.

Era il quint annual 2021 dal manaschi industrial da Landquart è vegni approvà unanimamain. El ha serrà cun in plus da 572 100 francs. (rtr/fmr)

## LA CIFRA DAL DI

# 67%

da tut l'ieli d'ulivas vegn produci en l'Unìun Europeica. En cifras è quai ad onn radund 2 milliuns tonnas. Ed en la UE vegn era consumà il pli bier ieli d'ulivas. A la testa èn ils Grecs cun in consum da radund 12 liters ieli d'ulivas per onn e chau. (fmr/sb)

## FESTIVAL DA LA CHANZUN RUMANTSCHA

## «I va propi en ina buna direcziun»

La suprastanza da l'uniun La chanzun rumantscha trai ina bilantscha positiva dal Festival da Zuoz. Pli u main 2500 visitadras e visitaders èn stads al Festival da la chanzun rumantscha che ha gi lieu l'ultima fin d'emna. Ils responsabels èn fitg cuntents cun las 49 novas cumposiziuns inoltradas. Il proxim Festival da la chanzun rumantscha ha lieu l'onn 2025 en Lumnezia.

MARTIN GABRIEL/FMR

Il Festival da la chanzun rumantscha ha er chattà a Zuoz resuns fitg positivs tar visitadras e visitaders, musicistas e musicists e tar interpretas ed interprets. Er Clau Scherrer, il president da l'uniun La chanzun rumantscha, guarda enavos cun satisfaziun sin il festival a Zuoz. «Ils organisaturs han fatg ina lavur excellenta, malgrà ch'els han ditg gi da batter cun las intschertezas da la pandemia.» La FMR ha discurrì cun Clau Scherrer il di suenter il festival da Zuoz.

**FMR: Las victuras ed ils victurs da las trais concurrenzias da cumposiziuns èn eruids. La giuria ed il public han decidì a moda e maniera differenta. Memia differenta?**

**Clau Scherrer:** La giuria ha fatg ina fitg buna schelta. Ella è sa tegnida fitg cler vi dals criteris dal reglament. In punct impurtant da quest regulativ è per exempel che las chanzuns ston esser chantablas per noss chors. Qua ha la giuria selecziunà cun gronda empatia, in summa fitg bain tenor mai. La sfida da selecziunar las chanzuns n'è betg simpla. La decisiun dal public è stada clera per mai. Il public ha decidì suenter avair udi ina giada las chanzuns e la giuria ha repassà pliras giadas minuziusamain las chanzuns tenor criteris e directivas. Quai èn damai duas differentas vias da giuditgar.

**L'idea oriunda era quella da recaltgar cumposiziuns novas per tuttas categorias da chors. Va quai cun las cumposiziuns inoltradas en la direcziun che Vos avevas ponderà?**

I va bunamain anc en ina meglra direcziun che quai che nus avevan ponderà. La pussaivladad da cumponer per il Festival da la chanzun rumantscha ha chattà ina buna resonanza gia avant l'emprim festival, e questa giada anc daplì. Apparentamain han ils cumponists plaschiar da cumponer per mauns d'in giudicament professional e dal public. Nus avain perfin cumponists internaziunals che han cumponi per nus. Plinavant essan nus stads en las sco-



Clau Scherrer, president da l'uniun La chanzun rumantscha trai bilantscha ed è optimistic per l'avegnir dal festival.

FOTO OLIVIA AEBLI-ITEM

las autas da musica ed avain deponì noss giavisch per cumposiziuns. Er quai è reussì. I va propi en ina buna direcziun. Nus avain uss 77 novas cumposiziuns or da dus festivals. Jeu sper che quai gjaja vinavant uschia.

**Trun l'onn 2019 e Zuoz 2022. Pon ins cumparegljar quels dus emprims Festivals da la chanzun rumantscha?**

Per nus da l'uniun tetgala èsi impurtant d'ir en las regiuns rumantschas cul festival. E nus vulain – sper il program fix che vegn da nus – er che mintga lieu integreschia ses agen colorit e sias atgnas spezialitads en il festival. Nus avain gi dus festivals fitg differents. Jau chat quai fitg bun. A mai han omadus festivals plaschi fitg bain. Igl è però grev da giuditgar quai en detagl gia oz.

**Il proxim Festival da la chanzun rumantscha duai avair lieu en Lumnezia. Vos turnais damai en Surselva e laschais ora il Grischun Central?**

L'uniun tetgala na po betg organiser senza il Festival da la chanzun rumantscha. Nus essan avisads da pudair surdar quai ad ina comité local. Ma igl è ina sfida da chattar in tal comité ch'è pront da surpigliar l'organisaziun locala. Questa giada avain nus gi in grond cletg da chattar en l'Engiadina Curdin Linsel ch'è stà immediat fiu e flomma per l'idea dal festival. En il Surmeir avain nus gi plirs discurs, ma i n'è betg stà pussaivel da chattar ina u pliras personas che fissan stadas prontas da s'engaschar per l'organisaziun. Ed uschia essan nus ans decidids da surdar il proxim Festival da la chanzun rumantscha en Lumnezia che ha mussà interess da surpigliar l'organisaziun. Jau vulless dentant accentuar che nus essan fitg interessads da surdar il Festival er en il Surmeir u er en la Sutselva.

**Pudais Vos gia tradir insatge dal proxim Festival da la chanzun rumantscha?**

Quai che nus avain ponderà è da dar in accent a la chanzun sacrala. La Lumnezia cun la baselgia da Pleiv e conturn a Vella purschess ina cullisa ideala per questa tematica. En la concorrenza da cumposiziuns vegnin nus segiramain a publitgar ina categoria da chanzuns per chors da dunns. Il Festival da la chanzun rumantscha duai restar ina occurrenza en questa grondezza sco en fin qua. Per mai èn ils cuntengs dal festival pli impurtants che la grondezza.



Cun quest code QR pudais Vos guardar l'entira purschida da RTR dal 2. Festival da la chanzun rumantscha a Zuoz.

## Certificat federal per puras grischunas

Tranter las 114 dunns che han retschet suenter ina scolaziun da dus onns il diplom federal sa chattan er diesch puras grischunas. Er ellas dastgan ussa sa numnar pura cun certificat professional federal.

GION NUTEGN STGIER/FMR

Dapi l'emna passada han 16 chantuns svizzers 114 puras cun in certificat professional federal. Bunamain tuttas han avant frequentar la scola da puras gia fatg cun success in emprendissadi. Per ina pura è quai ina buna basa professionala fundamentala er per far la scolaziun da puras. Las dunns che han terminà cun success la scolaziun da puras èn tranter 23 e 52 onns. La scolaziun cuzza dus onns cun in examen final. Las absolventas da la scola da puras èn en quels dus onns stadas preoccupadas cun nov roms obligatorics e cun dus roms facultativs. Cuschinar, orticultura, famiglia, societad, nutriment, tecnica da nettegiar e fabricaziun da products, quai èn roms obligatorics da la scolaziun per puras. D'emprer han las absolventas da la scola da puras er dretg agar e contabilitad agrara.

## Er ina lavur da diplom

Tar ils roms facultativs tutgan per exempel biestga manidla ubain muvel gross. Per exempel na tutga la cultivaziun dad ers betg tar in da quels roms tar la scola da puras. A la fin da schaner 2022 han las dunns e puras gi d'inoltrar lur lavur da project a l'experta principala. Suenter mintga rom han las absolventas gi in examen. L'examen final cumpiglia lura er in discurs spezialisà. Per frequentar la scola da puras è er obligatori che las absolventas han lavu-

ràs dus onns en lur bain puril, ubain en in auter manaschi puril. Las puras grischunas han fatg lur scolaziun al «Plantahof» e lura er al «Rheinhof» a Salez SG. Suenter avair absolvi la scola da puras dastgan ussa tut las absolventas esser

loschas da sa numnar puras cun certificat professional federal. Cun lur savida pon ellas er declerar a consuments e consumentas cun luschezza la valur da l'agricultura cun blier bel e nizzaivel per mintgin.



Las puras che han da nov in diplom professional federal. (davos da san.) Brita Klas, Dardin, Patricia Spichtig, Bravuogn, Katja Burkard, Maiavilla, Janine Mathis, Morissen e Melanie Pircher, Peist. (davos da san.) Ursina Mehli, Cuir, Alexandra Mehli, Maiavilla, Monika Alpiger, Maiavilla, Ramona Stgier, Parsonz. Sin la foto manca Claudia Strolz, Fideris.

FOTO MAD